

L convegn “Languages Meet Sport”

La d.ra Sabrina Rasom responsàbola de l'ofize linguistich del Comun general de Fascia à portà a Udin l'esperienza de l'Aisciuda Ladina

Mendranzes - A ge dèr l'ocajion al grop de fascegn de jir tel Friul a fèr chesta bela esperienza l'é stat Languages Meet Sport, Festival per i lengac e la cultures regionèles e de mendranza. N convegn endrezà a Udin dai ai 19 e ai 20 de otober del 2012 da man de Leader Comunicare Interculture, na agenzia che à senta a Trieste e la se cruzia de projec europeegn de baratament de lengac e cultures. La scomenzadiva la é stata portèda inant col patrozinie de l'Union Europeèna e de la Region Friul Venezia Giulia tras l'Arlef, l'ofize regional per la politica linguistica, co l'obietif de moscèr coche, ence tel sport, la desvalianza linguistica e culturèla l'é un di valores più fons che tegn adum l'Europa.

À tout pèrt al convegn la gran sozietèdes sportives europeènes leèdes a sie teritorie, desche la Udinese balon e l'Arsenal, dessema a champions de roda de la Fundacion Euskadi e etres raprezentanc de disciplines sportives e scomenzadives leèdes al sport de popolazions de mendranza: da la Frisia, da l'Irlanda, dal Galles e da la Slovenia, dal Sudtirolo e ence da Fascia. La scomenzadiva la era outa a scoles, universitèdes e gropes e sociazions culturèles e à tout pèrt prest siecent scoles de la scola autes de Udin. La scontrèdes, endrezèdes te sescions pienes e laboratories, les à uzà fora l valor del lengaz delaite da la sozietèdes sportives e la



Sabrina Rasom de l'ofize linguistich del Comun general de Fascia rejonà al convegn Languages Meet Sport.

coche l'é possibol ensegnèr n lengaz tras la pascion sportiva. N ejempie de gran segnificat l'é stat chel de l'Arsenal, olache n raprezentant de chesta sozietà l'à portà dant coche, delaite da l'endrez de chesta gran squadra, i bec fèsc ence corsc de lengaz e cultura. Ence la doura del basch per se baratèr la strategies de garejèda per radio anter i champions de roda l'é stat n ejempie de coche l lengaz pel esser met per tegnir adum e ge dèr n valor enjontà a la rejonèda de la mère. L'é stat ence portà dant projec e scomenzadives desvalives metui a la leta da la Comunità Europeèna per emparèr lengac foresc o stravardèr i lengac de mendranza. Ence i fascegn i é stac envié a tor pèrt a chesta scomenzadiva tras l'Ofize linguistich del Comun general de Fascia, per portèr dant l'Aisciuda ladina de chest an 2012 che l'à abù desche argoment l sport. L'é stat contà de la colaborazion anter i gropes e la sozietèdes sportives e la

aministrazion fascèna, col ge dèr peis e luster al valor che i à chisc gropes tel sparpagnèr fora l lengaz de la mère. Desche raprezentanc de Fascia a Udin l'é stat cernù i Volontadives del lengaz e l'envit ge é stat slarià fora ence ai raprezentanc de la sociazions sportives che aea didà dò l'Aisciuda. Scontrèdes de chesta sort dèsc l met de scontrèr e cognoscer mendranzes desvalives e de se baratèr esperienzes e projec. Per l davegnir l'Ofize servijes linguistics e culturèi del Comun General de Fascia à portà a cèsa neva idees, anter chestes la possibilità de endrezèr n tornoi de hockey ladin dai romances, ai ladins del Sela, ai furlegn o vèlch garejèda de corsa co la sociazions sportives ladines, con dut per ladin: reclames, endrez, rejonèdes. Idees jà spartides, te sie sboz, con vèlch raprezentant de la sociazions enteressèdes che à tout sù con gaissa la proponeta.

Sabrina Rasom